PEMIKIRAN DR. MAHATHIR TENTANG ISLAM

ISMAIL IBRAHIM







UTUSAN PUBLICATIONS & DISTRIBUTORS SDN BHD



Pengantar

SAYA memilih pemikiran Dr. Mahathir tentang Islam sebagai bahan karya saya kerana saya beranggapan bahawa beliau seorang pemikir dan pemikirannya itu pula telah dihalusi untuk dijadikan agenda pembangunan Islam di negara kita. Melalui kepimpinannya, beliau sentiasa berfikir untuk memajukan agama dan umat Islam, bukan hanya untuk umat Islam di negara kita, tetapi juga untuk umat Islam di seluruh dunia. Mesej itulah yang sentiasa dibawanya untuk dilaksanakan di negara kita oleh berbagai sektor dan agensi serta individu Muslim. Dibawanya juga ke dalam forum-forum antarabangsa untuk dikaji dan dilaksanakan oleh negara-negara Islam serta umatnya di mana saja mereka berada.

Ramai pemikir dunia yang memberi penghargaan kepada pembangunan Islam dan umatnya di negara kita kerana sikap sederhana dan hikmahnya, Utusan Publications & Distributors Sdn Bhd No. 1 & 3, Jalan 3/91A Taman Shamelin Perkasa, Cheras 56100 Kuale Lumpur

Tel: 03-92856577 Fax: 03-92846554/92875763

e-mel: enquiry@upnd.com.my laman web: www.upnd.com.my

© Utusan Publications & Distributors Sdn Bhd Terbitan Pertama 2002 Ulang Cetak 2002

Hak cipta terpelihara. Setiap bahagian daripada terbitan ini tidak boleh diterbitkan semula, disimpan untuk pengeluaran atau dipindahkan kepada bentuk lain, sama ada dengan cara elektronik, mekanik, gambar, rakaman dan sebagainya tanpa izin pemilik hak cipta terlebih dahulu.

ISBN 967-61-1338-7

2 1 AUG 2002

NASKAH PÉMELIHARAAN
PERPUSTAKAAN NEGARA MALAYSIA
APB 01076475

Dicetak oleh YEOHPRINCO SDN. BHD. Lot PT 50595, Jalan Seruling 59, Kaw. 3, Taman Klang Jaya, 41200 Klang, Selangor Darul Ehsan Malaysia. M 959.5054 15M contoh tentang kepincangan masyarakat Barat dalam institusi keluarga dan sosial yang serius. Inilah antara ciri positif dalam ajaran Islam yang merupakan sumbangan yang dapat disumbangkan kepada tamadun manusia.

Pandangan pemikir ini merupakan pandangan yang bersifat objektif setelah beliau melihat kepada perkembangan Islam di negara-negara Arab dan Islam sebelum dan selepas peristiwa 11 September, yang baginya dalam keadaan dunia pada hari ini, tidak mungkin Islam dapat dibangunkan dalam bentuk radikal dan terpisah daripada pembangunan dunia moden.

Sebenarnya, inilah pemikiran yang cuba dibangunkan di negara kita selama ini iaitu pembangunan Islam yang berasaskan kepada penguasaan ilmu pengetahuan dan teknologi, peningkatan ekonomi dan taraf hidup serta kesepaduan antara masyarakt yang berbilang kaum dan agama. Dalam masa yang sama menolak dasar ekstrim dan radikal yang hanya akan mengakibatkan kelemahan agama dan umat Islam itu sendiri.

Seorang pemikir Mesir, Dr. Kamal Abul-Magd, menerangkan bahawa negara-negara Islam pada masa kini mengalami tiga jenis krisis besar. Pertama, ketinggalan daripada arus kemajuan dunia. Kedua, bertambahnya perselisihan dan perpecahan sikap toleransi dan keterbukaan untuk kepentingan semua orang, Islam dan bukan Islam.

Seorang pemikir Amerika yang berasal dari Jepun, Fukuyama, memberikan pandangannya ketika ditemu ramah oleh majalah Wijhat Al-Nazar keluaran bulan Mac 2002, menyatakan bahawa Islam yang perlu ditonjolkan pada masa kini, khususnya selepas peristiwa 11 September ialah Islam yang membangun bersama-sama dengan nilai-nilai kemodenan, bukannya Islam radikal yang selama ini telah menjatuhkan nama baik Islam itu.

Beliau menekankan bahawa Islam yang dibangunkan secara radikal itu sebenarnya telah menjadi salah satu halangan besar untuk melaksanakan dasar demokrasi yang sihat, dan untuk mencapai tahap pembangunan yang baik dalam ekonomi dan politik di kebanyakan negara Islam dan Arab.

Dalam konteks ini, beliau berkata bahawa keadaan ini tidak menafikan wujudnya pembangunan
positif dalam negara-negara Islam lainnya seperti
Malaysia dan Indonesia yang telah berjaya menyesuaikan diri dengan pembangunan dunia moden pada hari ini. Malah dalam bukunya *The Great*Disruption, beliau menerangkan bahawa Islam sebenarnya dapat mengemukakan banyak penyelesaian
bagi menyeimbangkan antara kepercayaan agama
dengan institusi-institusi moden, sambil memberi

kejumudan pemikiran dengan golongan yang memperjuangkan perubahan dan kemajuan. Pembakaran tenaga dan kekuatan ini akan ditumpukan dalam pertelagahan dalaman tanpa kesudahan sehingga akhirnya negara dan umat Islam tidak berdaya lagi menghadapi serangan dan cabaran dari luar muka pintu mereka sendiri.

Inilah sebenarnya yang cuba dielakkan daripada berlaku dalam dunia Islam sejak beberapa lama dan ketika negara-negara Islam di rantau kita ini mencapai kemerdekaannya dahulu seperti Malaysia dan Indonesia. Maka perjuangan untuk menghindarkan pertelagahan dan konflik inilah sebenarnya yang telah dilakukan dan hasilnya kita telah dapat melihat kemajuan yang agak baik dalam mewujudkan pembangunan Islam yang mulai menerima asas-asas kemajuan dunia moden tanpa mengorbankan prinsip pokok Islam dalam akidah dan syariah serta moral kerohaniannya.

Bagaimanapun arus yang melanda umat Islam sehingga membawa kepada perbezaan pandangan yang serius tentang perjuangan politik umat Islam dan penghayatan Islam itu sendiri telah meninggalkan akibat yang besar dalam masyarakat Islam seluruhnya. Arus itu juga telah memasuki negara kita dengan timbulnya bibit-bibit yang memecahbelah-

antara umat Islam dan ketiga, pertembungan pemikiran yang serius antara golongan jumud dan tradisi dengan golongan ijtihad dan pembaharuan dalam satu situasi yang kelihatan seolah-olah satu peperangan yang membakar semua tenaga dan kekuatan umat serta menghalangnya daripada melangkah ke hadapan dan mencapai kemajuan.

Beliau juga memberi amaran bahawa kebanyakan orang Islam sekarang ini telah ditenggelami dalam rebut percakapan sehingga menghalang mereka daripada bekerja. Oleh itu, beliau berpandangan bahawa umat Islam sekarang ini mestilah memahami dan menyertai sistem hidup baharu bersamasama dengan masyarakat lain agar mereka tidak ketinggalan di belakang atau terasing daripada masyarakat dunia. (*Manarul-Islam*, Mei-Jun 2002, United Arab Emirate).

Kalau pandangan Dr. Kamal Abul-Magd dapat diambil dalam konteks negara-negara Islam sekarang ini, maka amat tepatlah seperti yang dikata-kannya bahawa kebanyakan negara dan umat Islam sekarang ini sedang membakar tenaga dan fikiran dalam "peperangan" dan "pertelagahan" sesama sendiri iaitu antara puak-puak yang bertentangan, sama ada dalam pemikiran dan perjuangan masingmasing, termasuk golongan yang mempertahankan

oleh pemikir dari Mesir, apa lagi pada saat ini kita sering berbicara tentang dunia Islam selepas peristiwa 11 September.

Bagaimanakah akan kita hadapi dunia luar sekiranya dunia kita sendiri tidak terurus dengan baik dan tidak dapat melepaskan diri daripada bergantung kepada orang lain. Dr. Kamal Abul-Magd bertanya, sehingga bilakah kita akan bergantung kepada negara musuh kita dalam berpakaian, mendapatkan bekalan makanan, ubat-ubatan dan senjata?

Malah satu pertanyaan lain yang boleh dikemukakan ialah bilakah agaknya kita akan dapat menghadapi musuh kita bersama sekiranya kita sesama sendiri masih belum dapat mengakhiri pertelagahan dan perselisihan antara kita?

Isu pembangunan Islam, kamajuan dan tamadunnya merupakan agenda besar umat Islam yang amat mencabar. Kita mungkin akan kecundang dan mengalami kegagalan buat selama-lamanya sekiranya kita tidak menyusun agenda dan operasi perjuangannya secara teratur dan berkesan.

Maka dalam hal ini, di samping banyak pemikiran dan pandangan lain, saya melihat bahawa pandangan dan pemikiran Dr. Mahathir bolehlah dijadikan satu asas perjuangan umat Islam seluruhnya untuk menempah satu sejarah tamadun Islam yang baharu dan mengulangi segala sesuatu kan umat Islam di negara ini dan seterusnya telah memerangkap kita semua dalam konflik yang berlarutan.

Saya tidak beranggapan bahawa semua yang diutarakan oleh Dr. Mahathir tentang Islam itu sebagai tongkat sakti yang dapat mengubah keadaan dalam sekelip mata. Malah saya juga tidak percaya bahawa kemajuan Islam dan pembangunannya yang pesat dapat diperjuangkan hasil daripada pemikiran seorang manusia sahaja seperti Dr. Mahathir. Tetapi saya memilih untuk berbicara tentang pemikiran beliau kerana saya melihat bahawa dalam mencapai kemajuan dan mengembalikan semula tamadun Islam, tidak banyak orang yang mahu memikirkan bagaimanakah caranya dan apakah agenda yang harus dilaksanakan. Malah tidak ramai pemimpin negara Islam sendiri yang komited untuk memajukan agama dan umatnya berdasarkan world-view atau tasawwur Islam yang sebenarnya, seterusnya menjadikannya agenda negara dalam memajukan umat dan agama Islam itu sendiri.

Pada hari ini, dunia Islam amat ketandusan pemimpin yang mempunyai pandangan jauh dan terkini sedangkan umat Islam amat memerlukan kepimpinan yang komited dan berpengetahuan, terutamanya ketika negara-negara Islam sedang menghadapi krisis besar seperti yang dikatakan

PEMIKIRAN DR. MAHATHIR TENTANG ISLAM

yang telah dicapai oleh umat Islam pada zaman kecemerlangannya.

Semoga Allah S.W.T memberikan petunjuk dan hidayah kepada kita semua. Amin.

ISMAIL HAJI IBRAHIM

Pemikiran Dr. Mahathir Tentang Islam

DR. MAHATHIR amat berminat tentang masalah Islam dan umatnya. Sejak daripada permulaan kerjayanya dalam bidang politik, beliau sering berbicara tentang Islam dan umatnya. Beliau memberikan pandangan dan analisisnya secara kritikal tentang isu-isu yang dihadapi oleh umat Islam, cabarannya dan bagaimana permasalahan umat Islam seharusnya ditangani dan diusahakan dengan bersungguh-sungguh untuk diselesaikan.

Di peringkat nasional dan antarabangsa, Dr. Mahathir sering menyatakan kebimbangannya tentang elemen-elemen yang membawa kepada perpecahan umat Islam, kemunduran mereka dalam bidang ilmu pengetahuan, perekonomian, keruntuhan moral dan sebagainya.

Beliau juga amat prihatin tentang keadaan

negara Islam yang kaya-raya dengan hasil minyak dan lain-lain, tetapi tidak dapat menggunakan kekayaan itu dengan sebaik-baiknya untuk mempertingkatkan prestasi dan kekuatan umat dalam dunia global dan maju ini.

Berdasarkan pemikiran inilah beliau sejak dari awal lagi iaitu semenjak memegang teraju pemerintahan negara telah berusaha menterjemahkan pandangannya ke peringkat perlaksanaan dan pengoperasian. Beliau mahukan sebarang pandangan dan perkataannya itu dapat dipraktikkan dalam negara sendiri dan berkemungkinan menjadi model untuk negara Islam lainnya. Namun, beliau sering menegaskan bahawa apa yang dilakukannya di Malaysia tidaklah mahu didakwa sebagai model untuk orang lain. Kalau orang lain merasakan bahawa kejayaan di Malaysia sebagai model, maka terpulanglah kepada mereka sendiri untuk menilaikannya.

Hasilnya, Malaysia pada abad dua puluh satu telah muncul sebagai negara Islam yang kuat dan dinamik, perkasa dalam bidang perindustrian, pembuatan, teknologi dan bidang lain yang mampu bersaing dengan negara lain di dunia ini yang telah pun menempatkan diri dalam kategori negara maju.

Syarikat-syarikat besar Malaysia dalam bidang petroleum, perindustrian, teknologi serta lain-lain telah menunjukkan kemampuan yang tinggi dalam menyumbang ke arah ketinggian ekonomi negara, termasuklah usaha sama dengan syarikat-syarikat luar negara sama ada dalam dunia Islam atau di luar dunia Islam. Ini membuktikan bahawa pandangan Dr. Mahathir untuk mempertingkatkan prestasi negara dalam semua aspek pembangunannya bukanlah hanya sekadar teori dan ucapan penuh retorika tetapi semua yang diperkatakan itu dapat dikotakan dengan visi dan wawasannya tersendiri sebagai satu sumbangan negara kecil antara negara-negara besar dan kaya di dunia.

Ketika negara kita melangkah ke hadapan dalam pembangunannya yang pesat, banyak negara Islam lain yang masih mengalami kemunduran akibat daripada kepemimpinan dan politik yang tidak stabil. Atau menghadapi masalah ekonomi dan pergolakan dalaman yang melibatkan perselisihan kaum, agama serta pelbagai masalah lain yang tidak mampu diatasi oleh negara-negara berkenaan disebabkan oleh keadaan dan situasi yang tertentu.

Dalam konteks ini, Dr. Mahathir sentiasa menekankan tentang pembangunan ekonomi sebagai satu asas penting untuk kekuatan negara dan umat Islam. Hanya dengan kekuatan ekonomi, negara dan umat Islam akan beroleh kejayaan dalam memperkuatkan diri mereka untuk menghadapi ancaman dari luar sama ada yang berbentuk ideologi, ekonomi, politik dan seribu satu cabaran yang dibawa oleh penjajahan bentuk baru.

Cara Dr. Mahathir mengatasi kemelut dan krisis ekonomi, khususnya krisis mata wang yang melanda negara kita pada akhir tahun sembilan puluhan, pada mulanya dipermain-mainkan oleh pelbagai pihak termasuk parti politik lawan dalam negara sendiri. Tetapi akhirnya beliau berjaya membuktikan kepada dunia bahawa caranya adalah yang terbaik, membawa hasil yang positif dan menguntungkan negara sendiri. Bukannya dengan cara menyerah kalah kepada kuasa besar politik dan kewangan dunia yang bertujuan memerangkap negara membangun ke dalam perangkap hutang dan penggadaian syari-kat-syarikat besar milik negara kepada kuasa ekonomi asing.

Tindakan beliau memperlihatkan jati diri dan ketahanan dalaman yang dituntut oleh Islam bagi orang Muslim dan Mukmin yang kuat agar bersedia dalam menghadapi musuh dengan segala kekuatan yang ada iaitu daripada kekuatan ilmu pengetahuan, jiwa dan rohani. Malahan orang Islam diperintah agar sentiasa bekerja dengan kuat dan tekun cekap dan amanah untuk menjadi masyarakat yang berdikari kerana langit tidak akan menurunkan hujan emas dan perak menurut kata-kata seorang khalifah Islam yang terkenal.

PEMIKIRAN DR. MAHATHIR TENTANG ISLAM

Tanpa beliau menyebutnya, Dr. Mahathir sebelarnya mahu menunjukkan contoh bagaimana beiau dapat membangunkan negara Islam yang kecil lan sederhana serta dengan penduduknya yang kecil ini untuk lahir sebagai negara perkasa dalam semua pembangunan fizikal dan spirituil, kebendaan dan kerohanian.

Berdasarkan hal inilah ketika berucap di Sidang Kemuncak Negara-Negara Islam yang dihadiri oleh 56 ketua negara Islam di Doha pada 12 November 2000, Dr. Mahathir antara lain menyentuh isu kelemahan negara-negara Islam dalam menghadapi penjajahan Zionisme Yahudi, iaitu dengan berkata:

Sadly, Muslim Countries, representing more than a third of the membership of the United Nations, watch helplessly as Israel continues with impunity and arrogance to kill innocent Palestinians. Such is the dire state of Muslim countries that we are unable to respond effectively to the challenge posed by the cowardly acts of Israel. Not only are the Palestinians under assault, so are Muslim honour and unity.

(Amat mendukacitakan bahawa negaranegara Islam yang mewakili lebih daripada satu per tiga keanggotaan Bangsa-Bangsa Bersatu hanya boleh memerhati tanpa dapat berbuat apa-apa ketika Israel terus bertindak membunuh orang Palestin yang tidak berdosa dengan penuh rasa bongkak dan sombong. Demikianlah keadaan negara-negara Islam yang menjadikan kita tidak berdaya sama sekali untuk membalas secara berkesan terhadap cabaran yang dilakukan oleh tindakan pengecut Israel itu. Serangan itu tidak hanya menimpa ke atas orang Palestin sahaja malahan menyentuh maruah dan kesepaduan orang Islam seluruhnya).

Kekejaman dan tindakan golongan Zionis Yahudi yang menindas dan menjajah rakyat Palestin sehingga berjaya mengawal pergerakan Presidennya, Yasser Arafat dan kepungannya ke atas tempat kediaman Presiden itu akhir-akhir ini menjadi simbol kelemahan dan kehinaan umat Islam seluruh dunia iaitu yang amat menjatuhkan maruah serta kewibawaan umat, yang sekaligus turut menjatuhkan imej Islam itu sendiri di mata dunia.

Beliau menegaskan hal ini bertujuan untuk menggerakkan semangat negara-negara Islam agar bersepakat untuk bangun menentang musuh secara bersama dan bersepadu atau sekurang-kurangnya dapat memberi tekanan ke atas Pertubuhan Bangsa-Bangsa Bersatu dan OIC sendiri dalam membela nasib negara dan umat Palestin yang ditindas secara kejam itu. Kekayaan yang dimiliki oleh negaranegara Islam nampaknya tidak memberi apa-apa erti sekiranya sebuah negara kecil yang menderita di bawah kekejaman rejim Zionisme Israel itu tidak dapat dibantu untuk melepaskan dirinya daripada penindasan yang zalim.

Maka dengan itu, semua negara dan umat Islam akan berasa amat malu dan hina kerana maruahnya dengan senang sekali diperkecil-kecilkan dan dicemari secara terang-terang oleh satu kaum yang kecil yang hanya menumpang di atas tanah milik orang Islam sendiri.

Dalam Syarahan Perdana anjuran Dewan Bahasa dan Pustaka dan Angkatan Belia Islam Malaysia, Dr. Mahathir menyatakan bahawa kesanggupannya untuk duduk bersama dengan pemimpin pembangkang di atas satu pentas adalah didorong oleh rasa keprihatinan beliau terhadap masalah yang dihadapi oleh umat Islam di Palestin yang menderita akibat daripada kekejaman kerajaan Israel ke atas mereka. Beliau meminta parti pembangkang supaya bersetuju dengannya dalam satu perjuangan yang dianggapnya sebagai perjuangan menentang musuh bersama umat Islam di negara ini tanpa mengira

ideologi politik kepartian masing-masing.

Hal ini menggambarkan keikhlasan dan kesungguhan beliau dalam memperjuangkan sesuatu prinsip sama ada di arena antarabangsa atau dalam negara sendiri, iaitu dengan niat untuk memberi sumbangan bagi mengatasi masalah yang dihadapi oleh negara dan umat Islam di mana sahaja mereka berada

Dr. Mahathir sering membicarakan punca kelemahan dan kemunduran umat Islam pada hari ini ketika umat lain sedang berlumba-lumba meningkatkan kemajuan dan pencapaian mereka. Beliau sering menegaskan bahawa kelemahan itu antara lainnya adalah akibat daripada kelemahan politik, ilmu pengetahuan dan ekonomi umat Islam sendiri. Dengan itu, negara-negara Islam yang kaya dan umatnya yang berjumlah lebih satu bilion itu menjadi umat yang sentiasa bergantung kepada kuasa asing dan tidak mempunyai kebebasan sendiri. Keadaan inilah yang menjadikan negara-negara Islam itu tidak mencapai tahap kemerdekaan sepenuhnya, malahan masih dijajah oleh penjajahan bentuk baru.

Dr. Mahathir menjelaskan hal ini ketika berucap dalam simposium anjuran Institut Kefahaman Islam Malaysia (IKIM) dan Oxford Centre for Islamic Studies di Petaling Jaya pada 25 April 1997, dengan katanya: Today, there is not a single Muslim nation that can be classified as developed, although a number of them are very wealthy, endowed with natural resources. But almost all are lagging behind in modern knowledge, technological skills and, in many instances, effective government. In fact, a state of near-anarchy prevails in quite a number of countries. By no criteria can any of these countries be classified as developed. Poverty, ignorance and instability have become such common features in Muslim nations that it is assumed that these are a natural consequences of following the teachings of Islam.

It is therefore not surprising that today the world associates Islam with backwardness. This angers many Muslim. They think that it is an unfair judgment. They are right, of course. It is unfair. It is not due to the teachings of Islam. But the fact remains that the Muslim nations are poor, backward, weak, disunited and dependent on non-Muslims for all kinds of things, including their own security and the continued existence of Islam itself.

(Pada hari ini, tidak ada sebuah pun negara

Islam yang termasuk ke dalam golongan negara maju, meskipun terdapat sebilangannya yang amat kaya iaitu dikurniakan dengan sumber-sumber kekayaan asli. Hampir semua negara Islam masih ketinggalan di belakang dalam bidang ilmu pengetahuan moden, kemahiran teknologi, dalam banyak hal dan pemerintahan yang berkesan. Kemiskinan, kejahilan dan ketidakstabilan merupakan gambaran yang biasa dalam masyarakat Islam sehingga telah menjadi andaian umum bahawa perkara ini semuanya berlaku akibat daripada mematuhi ajaran agama Islam.

Dengan itu, tidaklah menghairankan apbila seluruh dunia sering menghubungkan Islam dengan kemunduran. Hal ini membangkitkan kemarahan kebanyakan orang Islam. Mereka beranggapan bahawa tuduhan itu tidak adil kerana semuanya berlaku bukanlah kerana mereka mematuhi ajaran Islam. Namun, hakikatnya adalah nyata bahawa umat Islam merupakan umat yang miskin, mundur, lemah, berpecah belah dan sentiasa bergantung kepada orang bukan Islam dalam banyak perkara termasuk menjaga keselamatan mereka sendiri dan memastikan kelangsungan kewujudan Islam itu).

Pendirian beliau yang amat konsisten ini dapat difahami oleh seluruh masyarakat dunia, baik pun dunia Islam, Eropah dan Amerika, sehingga dengan itu beliau merupakan satu-satunya pemimpin Islam yang sanggup berbicara tentang umat Islam dan negaranya secara lantang dan berterus terang.

Beliau berpendapat bahawa kelemahan pentadbiran negara Islam juga merupakan salah satu faktor yang menjadikan negara tersebut sentiasa tidak dapat membangun dengan sendirinya untuk kepentingan rakyat negara tersebut. Negara Islam sering tidak mempunyai teknologi untuk mengeksploitasi kekayaan sendiri dan tidak juga mempunyai ahli teknologinya untuk mengusahakan kekayaan sendiri. Akibatnya negara Islam sering bergantung kepada teknologi dan juga jurutera teknologi asing. Hal inilah pada pandangan saya yang mendorong Dr. Mahathir sentiasa mencari jalan untuk menyedarkan umat Islam seluruhnya tentang kepentingan mencapai tahap yang tertinggi dalam bidang ilmu pengetahuan khususnya dalam bidang teknologi moden

Dalam tahun 1977, ketika beliau memegang jawatan Menteri Pelajaran, beliau telah menghadiri satu Persidangan Antarabangsa tentang Konsep Pendidikan Islam di Universiti King Abdul Aziz, yang diadakan di Hotel Continental Makkah. Persi-

dangan tersebut antara lain membincangkan tentang konsep pendidikan Islam yang berasaskan kesepaduan antara bidang ilmu wahyu dengan ilmu ciptaan manusia. Hasil daripada persidangan tersebut beberapa resolusi telah dikeluarkan iaitu tentang kesepaduan kurikulum, penyediaan buku teks, latihan tenaga pengajar dan sebagainya untuk merealisasikan penubuhan pusat pengajian Islam yang berasaskan kesepaduan ilmu yang dibincangkan itu.

Persidangan ini merupakan satu persidangan ulung yang mengumpulkan para intelektual dan sarjana Islam dari seluruh dunia untuk membincangkan satu agenda penting bagi umat Islam dalam menghadapi arus pembangunan moden dalam pelbagai aspek. Persidangan ini mengambil kesimpulan bahawa umat Islam akan menjadi maju dan kembali menjadi umat yang bertamadun sekiranya generasi muda Islam yang akan datang dapat menerima pendidikan yang berkonsepkan pendidikan Islam yang sebenarnya.

Persidangan ini juga telah merangka panduan bagaimanakah konsep ilmu dan pendidikan Islam secara sepadu itu dapat diterjemahkan ke dalam bentuk operasi dan pengwujudan institusi pendidikan bagi semua peringkat. Saya dapati bahawa Dr. Mahathir amat memahami matlamat persidangan

tersebut berdasarkan kepada langkah-langkah yang telah diambilnya selepas menghadiri persidangan tersebut.

Pada pandangan saya, hasil daripada pandangan itulah maka pada tahun 1981, ketika beliau memegang jawatan Perdana Menteri, beliau menimbulkan cadangan penubuhan Universiti Islam berdasarkan keputusan persidangan yang diadakan di Makkah itu. Sebagai Dekan Fakulti Pengajian Isam Universiti Kebangsaan Malaysia ketika itu, saya menerima panggilan daripada Dr. Sulaiman Daud, Menteri Pelajaran, yang menyatakan bahawa Perdana Menteri berhasrat untuk menubuhkan sebuah Universiti Islam di Malaysia dalam bentuk dan konsep yang baru serta ingin berbincang dengan saya dan Dr. Mohammad Kamal Hassan, Rektor Universiti Islam Antarabangsa Malaysia sekarang, yang ketika itu merupakan salah seorang tenaga pengajar di Jabatan Usuluddin dan Falsafah. Dalam kesempatan itulah Dr. Mahathir meminta supaya falsafah dan matlamat penubuhan universiti itu dirangka dan dirancangkan untuk beliau mengambil tindakan selanjutnya ke arah merealisasikan resolusi persidangan di Makkah pada tahun 1977 itu.

Idea penubuhan Universiti Islam yang dicetuskan oleh Dr. Mahathir itulah yang direalisasikan menjadi Universiti Islam Antarabangsa Malaysia (UIAM) yang mula ditubuhkan pada tahun tersebut dan kekal menjadi sebuah institusi pengajian tinggi Islam yang unik di dunia Islam sekarang ini. Hakikat penubuhan UIAM yang dilahirkan atas daya usaha Dr. Mahathir adalah satu kenyataan yang tidak boleh dinafikan sama sekali kerana saya sendiri telah terlibat secara langsung semenjak universiti tersebut belum di tubuhkan.

Penubuhan Universiti Islam Antarabangsa membawa misi untuk melahirkan para sarjana Islam yang berketerampilan dalam menghadapi alam dan dunia kecanggihan ilmu pengetahuan menjelang abad ke dua puluh satu serta dapat bersaing dengan umat yang lain untuk merebut peluang yang terbuka dalam pelbagai aspek pembangunan kesarjanaan umat manusia pada hari ini.

Dr. Mahathir sering menekankan tentang keperluan umat Islam untuk mempertingkatkan bidang ilmu pengetahuan yang menjadi salah satu senjata yang amat berkesan bagi pembangunan umat Islam. Sejarah kecemerlangan umat Islam dicapai hasil daripada ketinggian ilmu pengetahuan umat Islam pada ketika itu. Maka sejarah gemilang itu tidaklah hanya menjadi permainan dibibir dan kebanggaan yang penuh nostalgia tetapi seharusnya direalisasikan dalam pembangunan tamadun umat Islam kini. Dengan ini beliau melihat bahawa penubuhan

institusi pengajian tinggi Islam merupakan satu agenda keutamaan negara.

Terdapat beberapa buah negara Islam yang telah cuba untuk menubuhkan institusi pengajian tinggi yang membawa konsep seperti UIAM berdasarkan resolusi Persidangan Pendidikan Islam Antarabangsa yang diadakan di Makkah pada tahun 1977. Akan tetapi sehingga kini, yang masih berjaya meneruskan fungsinya ialah UIAM dan sebuah universiti yang cuba beroperasi dalam bentuk UIAM di Islamabad, Pakistan. Percubaan beberapa negara lain untuk menubuhkan institusi pengajian Islam tersebut menghadapi kegagalan kerana beberapa sebab yang tertentu. Akan tetapi UIAM berjaya membangun dengan pesatnya kerana komitmen kerajaan yang cukup kuat dalam memajukan institusi pengajian tinggi itu dengan sebaik-baiknya. Walau agaimanapun, dari sudut struktur dan kurikulumnya, UIA Islamabad adalah agak berbeza daripada UIAM

Pemikiran Dr. Mahathir tentang pembangunan ilmu pengetahuan di kalangan umat Islam untuk mempersiapkan diri bagi menghadapi zaman teknologi dan *survival* perjuangan umat Islam ini sering pula digandingkan dengan pembangunan kekuatan umat dan negara Islam dari segi kekuatan tentera, pertahanan, ekonomi dan perindustrian. Hal ini

perlu dilaksanakan oleh negara-negara Islam supaya tidak akan selama-lamanya bergantung kepada negara luar iaitu negara-negara maju untuk membantu negara-negara Islam.

Negara Islam mestilah dapat berdikari sebagai negara yang bermaruah dan kuat, dapat melepaskan diri daripada pergantungan kepada kuasa lain sama ada dalam pembangunan ekonomi, pertahanan dan politiknya. Kenyataan Dr. Mahathir berulang-ulang kali tentang kekayaan dunia Islam yang tidak diuruskan dengan baik dan dalam masa yang sama tidak dapat dimanfaatkan oleh sesama negara Islam yang terjajah dan tertindas oleh kuasa luar seperti Palestin umpamanya, telah menjadi kenyataan pada masa-masa yang terakhir ini, iaitu apabila rakyat Palestin terpaksa berjuang bersendirian tanpa dapat dibantu oleh negara-negara Islam lain disebabkan oleh ikatan perjanjian antarabangsa yang terus mengikat kuasa negara-negara Islam daripada memberi bantuan pertahanan kepada negara Palestin.

Hal ini membuktikan apa yang sering diperkatakan oleh Dr. Mahathir bahawa dalam zaman moden ini, negara yang telah membebaskan diri daripada penjajahan Barat dari segi politiknya sering kembali menjadi mangsa penjajahan bentuk baru iaitu dari segi tekanan ekonomi dan haknya untuk menentukan kebebasan pertahanan dan politiknya. Negara Palestin menjadi contoh terbaik bagaimana tekanan penjajahan bentuk baru dikenakan ke atas dunia Islam, sehingga tidak ada sebarang negara Islam yang dapat mengemukakan hal ini dan menyuarakan bantahan secara bebas kepada kuasa besar Amerika Syarikat yang menyokong Israel. Saya percaya bahawa Dr. Mahathir tentulah telah menyuarakan hal ini ketika beliau bertemu dengan Presiden Bush baru-baru ini.

Percubaan Dr. Mahathir untuk menyelesaikan kemerosotan ekonomi negara tanpa bergantung kepada Barat dan kelantangannya menyuarakan tentangan terhadap tekanan Barat kepada dunia Islam dan negara-negara membangun seluruhnya mendapat reaksi yang negatif dari Barat. Hal ini berlaku dalam bentuk tekanan serta sikap menentang yang ditujukan kepada beliau, juga kempen memburukburukkan Malaysia di mata dunia, terutamanya oleh media rasmi Barat yang membawakan berita-berita palsu tentang negara Malaysia serta menggambarkan seolah-olah Malaysia akan menjadi negara yang muflis, malah pada akhir-akhir ini dihubungkan pula Malaysia dengan sarang pengganas yang mempunyai kaitan dengan peristiwa 11 September.

Walau bagaimanapun, serangan dan kecaman itu tidak memberi kesan yang amat ketara kepada Malaysia kerana dari segi kenyataannya, negara ini masih tetap dapat membangun dengan pesat dan dalam banyak hal mengatasi negara-negara membangun yang lain dengan berlipat ganda. Nama Dr. Mahathir sendiri mulai muncul dalam dunia antarabangsa sebagai seorang ahli politik dan pemimpin yang konsisten serta mempunyai dasar perjuangan yang jelas sebagai pejuang keamanan dan perdamaian antarabangsa, yang bertindak terhadap kemiskinan, kejahilan, ketidakadilan, malah terhadap keganasan dengan mendahului negara-negara lain.

Di Malaysia, usaha beliau memerangi kekerasan dan percubaan beberapa golongan untuk bertindak menjatuhkan kerajaan secara kekuatan bersenjata dan keganasan telah menarik perhatian pemimpin Amerika Syarikat sendiri. Dr. Mahathir mendapat perhatian pemimpin dunia dalam hal ini kerana sekiranya dunia lain hanya baru menyedari tentang keganasan selepas peristiwa 11 September dan tindakan war against terror yang dimulai oleh Amerika Syarikat, namun Dr. Mahathir telah sekian lama melancarkan serangan terhadap gerakan militan dan radikal, termasuk perbuatan yang boleh menimbulkan kacau-bilau dan perjuangan yang menggunakan kekerasan dalam negara ini.

Berdasarkan keadaan ini, maka Presiden Bush

dan pimpinan Amerika Syarikat mulai berubah pandangan dan tanggapannya terhadap Dr. Mahathir. Mereka mula mengeluarkan kenyataan yang ringan dan agak positif terhadap Dr. Mahathir dan seterusnya menjemput beliau ke Rumah Putih di Washington untuk menemui beliau.

Sungguhpun pertemuan Dr. Mahathir dengan Presiden Bush pada mulanya dijadikan bahan politik untuk mengkritik pendiriannya oleh parti pembangkang, tetapi suara kritikan dan bangkangan itu akhirnya menjadi tidak berasas terutamanya ketika Dr. Mahathir mendapat kesempatan untuk menerangkan hal ini dalam perjumpaan di Dewan Bahasa dan Pustaka ketika diadakan syarahan perdana tentang isu Palestin antara beliau dengan Presiden PAS.

Pendirian teguh Dr. Mahathir dalam memperjuangkan hak umat Islam dan negara-negara membangun lainnya serta ketegasannya memperjuangkan hak rakyat yang tertindas terutamanya rakyat Palestin dan Bosnia yang menderita sekian lama oleh kekejaman musuh masing-masing, merupakan satu-satunya suara lantang daripada pemimpin Islam dalam menghadapi krisis yang meruncing itu. Malah ketika diadakan persidangan Menteri-Menteri Luar negara OIC di Kuala Lumpur tahun ini, para perwakilan dapat melihat pendirian tegas Malaysia membela hak rakyat Palestin untuk membebaskan negara mereka daripada penjajahan Israel yang melampaui batas-batas kemanusiaan.

Hal ini dapat dibuktikan dengan kenyataan-kenyataan yang pernah dikeluarkan oleh kalangan pemimpin Islam di seluruh dunia, termasuklah kenyataan Menteri Luar Palestin dan beberapa orang perwakilan lain ketika berlangsungnya Persidangan Khas Menteri-Menteri Luar Negara (OIC) tentang keganasan di Kuala Kumpur pada 1-3 April 2002 di Kuala Lumpur itu, yang dihadiri oleh 52 negara Islam daripada 56 negara anggota OIC.

Para perwakilan telah meletakkan harapan yang besar agar Malaysia, terutamanya Dr. Mahathir sendiri akan dapat menggunakan pengaruhnya untuk memberikan definisi dan gambaran yang jelas tentang keganasan terutamanya kepada Amerika Syarikat dan dunia Barat umumnya yang sering mengaitkan isu keganasan dengan Islam dan umatnya. Mereka juga mengharapkan agar Dr. Mahathir dapat menyampaikan suara hati pemimpin dan umat Islam kepada kuasa besar Barat terutamanya Amerika Syarikat yang diterajui oleh Presiden Bush.

Dalam konteks ini, Dr. Mahathir sering mengemukakan pandangannya bahawa label keganasan yang sering diberikan kepada umat Islam yang tertindas dan yang memperjuangkan kebebasan tanah airnya adalah satu label yang tidak tepat, malahan menghubungkan perbuatan militan dan keganasan dengan agama apabila keganasan itu dilakukan oleh orang Islam adalah satu perbuatan yang menghina agama, kerana ketika berlaku kekerasan dan kekejaman yang dilakukan oleh orang di Ireland Utara umpamanya, maka pengganas itu tidak pula digelar sebagai pengganas Kristian, Protestant atau Katholik.

Satu hakikat yang seharusnya diakui oleh negara-negara Islam ialah bahawa negara-negara itu pada umumnya menghadapi kelemahan pentadbiran dan pengurusan serta kelemahan kepimpinan. Semuanya ini telah membawa kepada kelemahan dan kemunduran dari segi ekonomi, pendidikan dan pemerintahan pada umumnya. Persoalan yang sering ditimbulkan ialah kenapakah umat dan negara Islam terus-menerus berada dalam kelemahan dan kemunduran?

Daripada kenyataan yang dapat saya kesan melalui pemikiran Dr. Mahathir untuk menjawab persoalan ini ialah di samping beberapa sebab yang tertentu, ternyata sekali bahawa kemunduran dan kelemahan umat Islam berpunca daripada krisis dalaman umat Islam dan permainan politik kuasa besar dan negara-negara maju yang mengeksploi-

tasi krisis tersebut untuk kepentingan mereka.

Negara Islam sering menghadapi krisis dalaman akibat daripada perbezaan dalam mentafsirkan ajaran agama yang tertentu atau kerana sifat dan sikap taksub kepada para pemimpin secara melampau. Ataupun kerana kejahilan dan kekurangan ilmu pengetahuan yang membawa kepada fahaman sempit sama ada dalam bidang agama, politik, ekonomi dan sebagainya, sehingga menjadikan orang itu akan selama-lamanya menyalahkan orang lain semata-mata, terutamanya kerajaan yang memerintah.

Dalam hubungan antarabangsa yang lebih luas, dunia Islam sering menjadi mangsa proses modenisasi dan globalisasi kerana dunia Islam tidak mempunyai persiapan yang cukup untuk menghadapi proses itu, malahan dunia Islam masih terlalu jahil untuk memahaminya. Dengan itu, dunia Islam sering hilang keyakinan diri dan tidak dapat berdiri dengan sendiri dalam menghadapi arus perubahan yang berlaku dengan cepat.

Proses globalisasi umpamanya telah meletakkan negara Islam dalam perangkap negara maju seperti yang dijelaskan oleh Dr. Mahathir dalam ucapannya di Persidangan Kemuncak yang ke-2 Kumpulan D8 (8 buah negara membangun Islam) yang berlangsung di Dhaka, Bangladesh pada 1 Mac 1999, ketika beliau menyatakan pandangannya yang berikut:

Globalisation assumes many forms. When we agreed to globalisation, we thought that we would be able to share the wealth and technology of the rich countries. But the rich countries are actually thinking about how globalisation would enable them to exploit the untapped resources of the poor countries by using their huge capital and sophisticated technology. The attack on the currencies of Thailand, Indonesia, South Korea and Malaysia is just one example of how they exploit globalisation. Even though exploiting the poor to enrich themselves cause more poverty and misery, so long as it is done in the name of globalisation, it is considered fair and proper.

Currency speculation and stock-market raids are just the beginning. We can be assured that newer interpretations of globalisation will be made which open up newer ways for the exploitation of the poor by the rich.

(Globalisasi mengandaikan banyak bentuknya. Ketika kita bersetuju dengan globalisasi, kita beranggapan bahawa kita akan dapat berkongsi kekayaan dan teknologi dengan ne-

gara-negara kaya. Akan tetapi negara-negara kaya sebaliknya sedang memikirkan bagaimanakah globalisasi akan membolehkan mereka untuk mengeksploitasi segala sumber kekayaan negara miskin yang belum disentuh dengan menggunakan modal yang amat besar dan teknologi yang serba canggih. Serangan mata wang ke atas negara Thailand, Indonesia, Korea Selatan dan Malaysia merupakan satu contoh bagaimana mereka telah mengeksploitasi proses globalisasi. Sungguhpun perbuatan memeras negara miskin untuk memperkayakan negara mereka menyebabkan lebih banyak kemiskinan dan penderitaan tetapi selagi hal itu dilakukan atas nama globalisasi, maka bagi mereka perbuatan itu adalah adil dan hetul.

Spekulasi mata wang dan serangan ke atas pasaran saham merupakan langkah permulaan sahaja. Kita yakin bahawa pentafsiran baru bagi globalisasi akan membuka lebih banyak cara untuk yang kaya memeras yang miskin).

Negara-negara Islam dalam menghadapi arus globalisasi ini kelihatan kebingungan dan cemas kerana dilanda krisis identiti, kurang keyakinan diri dan tidak mampu menghadapi arus eksploitasi yang amat deras sehingga terdapat negara-negara Islam yang menyerah kalah dan tunduk di bawah telunjuk negara-negara maju yang mencetuskan gagasan globalisasi itu. Dr. Mahathir menyebut hal ini dalam Persidangan Kemuncak yang ke-2 Kumpulan D8 dengan berkata:

While the exploitation takes place, the developing Muslim nations are struggling to cope with ideologies and systems of government. We are trying hard to make democracy work, but as soon as we succeed, the goal post is moved or shifted and democracy is reinterpreted. And this is when the Muslim world finds itself unable to cope with the even more liberal interpretations of democracy.

(Ketika pemerasan sedang berlaku, negaranegara Islam yang sedang membangun akan berhempas pulas untuk menangani pelbagai ideologi dan sistem pemerintahan. Kita cuba bersungguh-sungguh untuk melaksanakan demokrasi, tetapi sebaik sahaja kita berjaya, maka tiang gol telah berubah atau dipindahkan, lalu demokrasi diberikan pentafsiran semula. Semuanya ini berlaku ketika dunia

Islam mendapati diri mereka tidak berdaya lagi untuk menangani pentafsiran yang lebih liberal bagi demokrasi).

Contoh-contoh yang saya sebutkan di atas jelas membayangkan pemikiran Dr. Mahathir yang mendahului para pemimpin dunia Islam dan negaranegara membangun umumnya dalam memahami isu global yang banyak sekali membawa cabaran kepada pembangunan dunia Islam dan sekali gus mencabar kemerdekaan dan kewibawaan negaranegara Islam yang mengakibatkan pencemaran imej Islam dan umatnya.

Berdasarkan hal inilah maka Dr. Mahathir merumuskan formulanya sendiri bagaimana mengatasi kemelut kewangan dan ekonomi yang melanda negara tanpa bergantung kepada penyelesaian Barat yang pada akhirnya akan memerangkap negaranegara membangun itu sendiri.

Cetusan rasa dan idea yang dikeluarkan oleh Dr. Mahathir sejak beberapa lama sebenarnya telah mendahului sejarah dan peristiwa yang dialami umat Islam pada masa ini. Penonjolan Dr. Mahathir tentang imej Islam dan umatnya yang sentiasa dipandang rendah kerana kemunduran dan ketinggalannya dalam segala bidang kemajuan di dunia ini telah menjadi kenyataan dengan penindasan dan

permusuhan yang ditujukan kepada umat Islam dalam peristiwa Bosnia Herzegovina, rakyat dan negara Palestin serta peristiwa 11 September yang mengakibatkan seluruh dunia Islam dan umatnya di mana saja mereka berada dipandang dengan pandangan jelek dan hina serta dibenci dan disumpah secara berterusan.

Dr. Mahathir telah mengambil tindakan secara proaktif untuk menghadapi serangan Barat terhadap Islam, terutamanya oleh media Barat yang amat berpengaruh dalam memberikan gambaran dan imej negatif terhadap Islam yang ditonjolkan sebagai agama keganasan, radikal, umatnya yang tidak rasional, bertindak secara emosi dan sebagainya. Tindakannya adalah untuk mengatasi masalah ini secara intelektual dengan menginstitusikan penyelidikan, penerbitan dan penyebaran maklumat yang betul tentang Islam.

Beliau mengharapkan bahawa dengan memahami Islam secara betul dan menyeluruh sebagai satu cara hidup yang lengkap, maka umat Islam dan bukan Islam akan dapat membetulkan persepsi mereka tentang Islam dan umatnya yang selama ini diselewengkan oleh propaganda media Barat yang bertindak secara agresif menyerang agama Islam dan umatnya.

Berdasarkan pemikiran inilah maka beliau telah

menubuhkan Institut Kefahaman Islam Malaysia (IKIM) dalam tahun 1992 dengan matlamat utamanya untuk membetulkan kefahaman tentang Islam dan berusaha mengubah pandangan umum tentang Islam yang digambar dan ditonjolkan dalam imej yang amat negatif itu.

Ketika Dr. Mahathir memanggil saya untuk membincangkan agenda penubuhan IKIM dan meminta saya merangka kertas penubuhannya dalam tahun 1991, beliau telah menjelaskan tujuan penubuhannya seperti yang tersebut dan menyatakan harapannya agar penubuhan institut ini akan dapat membetulkan kefahaman dan persepsi orang Islam dan bukan Islam tentang kebenaran Islam, iaitu dimulai dengan masyarakat Malaysia, seterusnya ke dalam masyarakat antarabangsa, termasuk dunia Barat yang amat keliru tentang Islam.

Penubuhan IKIM sebagai sebuah tangki pemikir merupakan satu usaha ulung dalam dunia Islam yang melihat kepada isu-isu keislaman sebagai isu sejagat yang merangkumi segala aktiviti dan pemikiran untuk membangunkan Islam dan umatnya sesuai dengan perkembangan dunia semasa dan perhubungan antarabangsa yang memerlukan interaksi umat Islam dalam arena antarabangsa.

Sesuai dengan objektif penubuhannya itu, maka IKIM telah berfungsi dengan berkesan untuk memperojekkan world-view Islam atau tasawwur Islami dalam bidang kehidupan kerohanian, kebendaan dan pemikiran manusia. Perhubungan Islam dengan kehidupan dunia manusiawi merupakan satu persoalan yang memerlukan analisis dan pengolahan yang betul agar orang Islam dan bukan Islam dapat memahami persoalan ini dengan baik kerana kesalahan fahaman tentang hal ini akan membawa pemikiran dan persepsi manusia kepada aliran negatif. Hal ini pula boleh membawa umat Islam balik ke belakang dalam kehidupan yang seharusnya maju dalam era serba moden ini.

Namun, isu moral dan etika adalah isu utama yang amat terhakis dalam kehidupan manusia kini. Nilai dan etika sering diabaikan dalam kehidupan yang penuh persaingan dalam segala aspek kehidupan pada hari ini, sama ada dalam perniagaan dan usaha mengumpulkan kekayaan, mencari pengaruh dalam bidang politik, sosial dan sebagainya. Semuanya ini sering menjadikan manusia amat gelojoh dan bersifat individualistik melampau sehingga tidak lagi menghiraukan kepentingan masyarakat, apa lagi kepentingan negara. Maka semuanya ini haruslah dipandang dan diamalkan mengikut nilai dan etika serta moral kerohanian Islam yang sememangnya bersifat universal dan sarwajagat.

Selama sepuluh tahun saya berkhidmat di IKIM,

agenda kerjanya yang merangkumi perkara di atas telah menghampiri matlamatnya iaitu dengan perubahan pemikiran dan persepsi yang kedapatan dalam masyarakat Islam dan bukan Islam di negara kita. Juga pengiktirafan antarabangsa terhadap peranan IKIM di Timur dan Barat, sungguhpun terdapat kalangan yang cuba mempolitikkan penubuhan institusi ini.

Suara-suara sumbang yang mengkritik penubuhan IKIM dengan andaian untuk dijadikan alat politik oleh Dr. Mahathir akhirnya meleset sama sekali disebabkan oleh pengiktirafan dan keterlibatan masyarakat Malaysia dan antarabangsa yang mengetahui peranan dan objektif penubuhan institusi ini.

Selama sepuluh tahun saya terlibat dengan pimpinan IKIM, saya tidak pernah menerima tekanan daripada sesiapa pun tentang apakah agenda yang harus saya lakukan dan apakah agenda yang tidak harus saya lakukan. IKIM mempunyai kebebasan yang cukup untuk melaksanakan programnya berdasarkan objektif dan matlamat penubuhannya tanpa diganggu-gugat oleh mana-mana pihak termasuk pengaruh politik kepartian. IKIM bertindak sebagai *think-tank* untuk memberikan kefahaman Islam yang betul dan mengkaji dasar Islam yang dapat membantu pembangunan negara dan rakyat

Malaysia dengan sewajarnya, di samping mengkaji isu antarabangsa yang mempunyai hubungan dengan umat Islam seperti institusi media, keluarga, belia dan sebagainya.

Selama sepuluh tahun saya bersama IKIM, Dr. Mahathir tidak pernah sekalipun memberi arahan kepada saya untuk membuat sesuatu yang boleh ditafsirkan sebagai usaha untuk memprojekkan dirinya atau partinya. Beliau tidak pernah campur tangan dalam hal-ehwal pentadbiran atau program IKIM. Menurut ingatan saya, beliau hanya sekali sahaja mengadakan pertemuan dengan ahli Lembaga Pengarah ketika IKIM mula ditubuhkan dalam tahun 1992. Pertemuan singkat di pejabatnya itu bertujuan untuk menjelaskan lagi pandangannya tentang penubuhan institusi ini dan peranannya. Tetapi beliau tetap menyerahkan cara pelaksanaannya kepada IKIM sendiri kerana pelaksanaan program IKIM adalah bersifat intelektual dan penyelidikan untuk kepentingan Islam dan umatnya dalam dunia yang serba mencabar ini.

IKIM mendapat pengiktirafan antarabangsa kerana peranannya yang merangkumi masyarakat manusia sejagat dan penjelasannya tentang Islam yang melampaui sempadan negara bangsa yang terhad atau yang hanya merangkumi ritual serta kerohanian yang berbentuk ibadat khusus untuk

orang Islam sahaja. Terdapat beberapa buah negara yang telah mencontohi Malaysia dalam penubuhan institusi pemikir Islam seperti IKIM. Di Beirut, Lebanon, menurut Mufti Lebanon yang pernah melawat IKIM pada tahun 1993, sebuah institusi seperti IKIM telah ditubuhkan di sana. Masyarakat Islam di Sepanyol juga memberitahu saya bahawa mereka juga telah menubuhkan institusi yang sama iaitu yang bergerak dan aktif bukan hanya dalam bidang ibadat khusus dan fardu ain tetapi melewati batasbatas isu-isu semasa yang lebih mencabar.

Penubuhan IKIM sekali lagi membuktikan visi Malaysia yang jauh ke hadapan iaitu dalam membangunkan negara dan umat Islam. Kita tidak seharusnya menyempitkan agenda kerja dan perjuangan kita kepada perkara asas ibadat sahaja, sungguhpun perkara ini merupakan perkara dasar yang penting. Namun, dalam membangunkan minda dan aktiviti pembangunan umat Islam, maka pembangunan pemikiran dan intelektual adalah amat penting supaya umat Islam tidak akan selama-lamanya hanya menjadi pelanggan dan pengguna tetapi akan menjadi umat yang dapat menyumbang kepada pembangunan ilmu pengetahuan termasuk sains dan teknologi, perekonomian dan perindustrian, serta bidang profesionalisme lain.

Banyak negara Islam sehingga ke saat ini masih

tidak dapat memahami pembangunan Islam secara holistik dan menyeluruh. Mereka masih memahami Islam dalam konteks fardu ain dan ibadat khusus, sedangkan aktiviti dan program negara yang lain dilihat sebagai sesuatu yang tidak mempunyai hubungan dengan dasar Islam dan ajarannya. Dalam persidangan antarabangsa yang melibatkan orang Islam yang pernah saya hadiri, ternyata bahawa pengucapan dan kertas yang dibentangkan masih lagi berkisar dalam skop yang sempit dan berbentuk tradisional. Masih banyak khutbah yang dihamburkan kepada para peserta sedangkan pada hari ini umat Islam menghadapi banyak persoalan semasa dan perubahan dunia yang tidak terjawab dari sudut pandangan agama, apa lagi dari sudut intelektual manusia sendiri yang telah meningkat dengan tingginya.

Sekiranya kita telah melengkapkan diri dengan kefahaman Islam yang sebenarnya tentang persoalan keluarga, sosial, ekonomi, pendidikan, politik dan sebagainya sejak beberapa lama dulu, maka kita tidaklah lagi hanya menjadi umat yang terlalu defensif terutamanya selepas berlaku tragedi 11 September.

Tragedi 11 September telah memerangkap umat dan kebanyakan negara Islam dalam keadaan yang membingungkan. Ini menyebabkan umat Islam menjadi panik dan tidak tahu apakah tindakan yang seharusnya diambil dalam menghadapi pelbagai serangan musuhnya yang bertindak memusuhi umat Islam. Bagi kita peristiwa 11 September sungguhpun meninggalkan kesan yang agak memeranjatkan, tetapi dalam banyak perkara kita telah pun menyedari akibat kejadian itu sejak lama dulu walaupun peristiwa itu hanya baru berlaku dalam tahun 2001.

Malaysia menyedari akan kepentingan keharmonian kaum dan kestabilan politik dan ekonomi sebagai satu rukun untuk membangunkan negara secara produktif. Maka dalam bidang pemerintahan negara, sejak negara mencapai kemerdekaan pada tahun 1957, kita telah mengamalkan pemerintahan secara berkongsi kuasa antara semua etnik secara adil. Konsep "Perikatan" kemudian "Barisan Nasional" merupakan satu pakatan pelbagai etnik yang amat unik dan dapat diterima oleh majoriti penduduk Malaysia. Hal ini dibuktikan setelah sepuluh kali pilihan raya diadakan di negara kita, Perikatan dan Barisan Nasional masih dapat mempertahankan kuasanya dan tidak pernah sekalipun kalah dalam persaingan merebut tampuk pemerintahan persekutuan, walaupun mengalami kekalahan di sebuah dua negeri. Hal ini dapat menjamin kestabilan politik Malaysia dan perhubungan kaum yang harmoni

dalam masyarakat berbilang kaum, agama dan budaya.

Amalan demokrasi di Malaysia menghasilkan kestabilan ekonomi dan sosial semenjak negara mencapai kemerdekaan. Pengagihan kekayaan negara telah dibahagikan secara adil iaitu sesiapa yang pandai mencari peluang, maka dia akan mendapatnya. Golongan minoriti sentiasa dilindungi walau sekecil mana sekalipun peratusan golongan minoriti itu, seperti terdapatnya undang-undang yang melindungi pengikut agama Sikhisme daripada memakai topi keledar semasa menunggang motosikal kerana serban bagi agama tersebut merupakan simbol agama yang harus dipatuhi. Hal yang sama juga dilaksanakan bagi orang Islam yang memakai serban.

Dasar negara semasa pemerintahan Dr. Mahathir yang diwarisi daripada pucuk pimpinan sebelumnya adalah amat terbuka dan sederhana. Dengan itu, rakyat yang berbilang kaum dan agama tidak berasa tertekan dengan peraturan dan undang-undang yang berat sebelah. Ini merupakan satu dasar Islam dalam beragama dan memberi kebebasan meng-amalkan budaya hidup sesuatu kaum itu.

Atas dasar inilah Malaysia menyaksikan kehadiran sekolah dan pusat-pusat pendidikan daripada semua peringkat yang memberi kebebasan kepada semua kaum dan etnik untuk mempelajari bahasa masing-masing. Mereka tidak diberikan arahan untuk menukar nama asli mereka mengikut sesuatu nama yang tertentu. Malahan bagi bukan Islam yang menganut agama Islam juga, mereka tidak perlu menukarkan nama mereka sekiranya mereka tidak berhasrat berbuat demikian.

Perkembangan positif yang wujud dalam masyarakat Malaysia berlaku secara tersendiri tanpa peraturan yang ketat. Pada mulanya, ketika negara mencapai kemerdekaan dalam usianya yang masih muda, orang Melayu berasa janggal dan tidak begitu gemar melihat kaum bukan Melayu mengamalkan budaya hidup mereka seperti tarian singa dan perarakan orang beragama Hindu ketika merayakan perayaan mereka. Lama-kelamaan segala amalan tradisi kaum dan cara merayakan hari perayaan mereka telah menjadi perkara biasa dalam negara ini. Mereka dapat melakukannya secara aman dan harmoni tanpa terdapat sebarang gangguan daripada kaum lain. Malahan perayaan seperti itu telah sebati menjadi satu amalan yang dihormati di kalangan masyarakat negara ini.

Di kalangan masyarakat Islam pula, tanpa peraturan dan undang-undang, orang Islam mulai menyedari tentang penghayatan agamanya. Pendidikan dan pendedahan kepada Islam yang dilakukan di sekolah dan di institusi pendidikan, seterusnya pembinaan keluarga, penerapan nilai-nilai Islam dalam masyarakat serta program-program lain telah menyedarkan orang Islam tentang ajaran agamanya. Gadis dan wanita Islam yang terdidik dalam suasana keagamaan ini dengan sendirinya akan menghayati Islam dalam kehidupannya. Maka sekiranya dalam jangka dua tiga dekad yang lalu, tidak banyak wanita yang menutup aurat tetapi kini peratusan wanita yang berbuat demikian telah meningkat dengan tinggi. Semuanya ini berlaku atas keinsafan dan kesedaran mereka sendiri tanpa terdapat undangundang yang memaksa mereka berbuat demikian.

Dengan ini dapatlah disimpulkan bahawa masyarakat perlulah dididik dan didedahkan kepada ilmu pengetahuan yang cukup untuk memberikan kesedaran kepada penghayatan nilai-nilai moral kerohanian Islam secara yang baik. Dengan itu mereka dengan sendirinya akan bertindak mengikut ilmu pengetahuan dan rasa ikhlas untuk mematuhi agama terpancar daripada hati sanubari mereka sendiri.

Perubahan yang berlaku dalam masyarakat Islam ke arah menghayati agama bukanlah dilakukan secara paksaan dan tekanan, tetapi dilakukan secara terbuka dan dakwah serta panduan atau tun-

juk ajar yang berhikmah melalui penghayatan nilai agama yang juga dilakukan secara praktikal melalui institusi keluarga, media, pendidikan dan sebagainya.

Namun, undang-undang memanglah seharusnya diadakan dalam beberapa perkara yang boleh membawa kepada penyalahgunaan sesuatu kelonggaran yang dibenarkan oleh syariah. Untuk melindungi wanita umpamanya, terdapat peruntukan dalam undang-undang keluarga Islam yang mengawal amalan poligami kerana poligami yang diharuskan oleh agama itu sering disalahgunakan oleh kaum lelaki yang tidak bertanggungjawab.

Menggubal undang-undang tersebut bukanlah bererti mengingkari perintah Allah S.W.T yang mengharuskan lelaki berpoligami. Akan tetapi undang-undang tersebut digubal sebagai manifestasi kehendak agama agar poligami dilakukan dengan adil dan saksama sehingga amalan poligami ini tidak membawa kepada keretakan rumah tangga, ketidakstabilan keluarga dan menzalimi wanita dengan sewenang-wenangnya kerana hal ini adalah dilarang oleh agama Islam. Manusia yang bernama manusia sering mempunyai kelemahan sendiri yang mungkin membawa kepada salah laku. Maka ketika ini undang-undang dunia adalah diperlukan untuk

melindungi hukum Islam seperti yang terdapat dalam al-Quran dan hadis.

Menyedari tentang perkara itu jugalah maka langkah mendidik masyarakat amatlah penting dijalankan dengan bersungguh-sungguh. Sejak kebelakangan ini, kita dapat melihat bagaimana masyarakat Islam telah didedahkan dengan berbagai saluran pembelajaran tentang agamanya, malahan pendidikan agama menjadi satu aliran yang dominan dalam bidang pengajian formal negara. Hal inilah yang sering ditekankan oleh Dr. Mahathir, iaitu kepentingan pendidikan kepada semua peringkat masyarakat dalam semua bidang.

Dr. Mahathir juga mementingkan keadilan terhadap wanita di negara kita. Pandangan beliau yang sering dikemukakan dalam beberapa forum dan persidangan wanita ialah tentang kehadiran wanita di negara kita yang merupakan separuh daripada penduduknya merupakan satu hakikat yang seharusnya diberikan perhatian yang sewajarnya. Maka kedudukan ini memerlukan perancangan yang serius dari segi memberikan peluang-peluang kepada wanita untuk mendapatkan haknya dalam masyarakat serta memajukan diri mereka dalam bidang pekerjaan dan pembangunan negara agar negara mendapat manfaat daripada sumbangan mereka.

Pandangan ini meletakkan wanita di negara kita pada satu kedudukan yang baik dibandingkan dengan kedudukan wanita di sesetengah negara membangun dan negara Islam yang lain. Hal ini telah berjaya meningkatkan imej negara kita dan berjaya pula menonjolkan wajah Islam yang lebih progresif bagi membantu meningkatkan imej Islam di negara-negara Islam tentang kedudukan wanita dalam masyarakat. Masyarakat Islam di beberapa buah negara Islam sehingga kini masih tidak meletakkan wanita pada kedudukan yang sewajarnya dan wanita di negara-negara tersebut tidak dapat menikmati hak-hak mereka seperti yang dibenarkan oleh agama. Keadaan ini sering dibangkitkan oleh pandangan umum dunia yang menuduh bahawa Islam mengamalkan dasar diskriminasi terhadap wanita.

Hal ini juga pernah ditimbulkan oleh Dr. Alvin Toffler ketika beliau melawat IKIM pada tahun 1993, iaitu dengan mengatakan bahawa beliau melihat wajah Islam di Malaysia agak berbeza daripada wajah Islam di negara asal Islam. Dia amat kagum dengan amalan Islam di negara ini yang sederhana, terbuka dan penuh toleransi serta kedudukan wanitanya yang sama taraf dengan lelaki dalam banyak hal. Menurutnya lagi, keadaan ini merupakan sesuatu yang tidak terdapat di beberapa buah negara Islam yang lain.

Pengiktirafan antarabangsa terhadap pemikiran Dr. Mahathir amat terserlah sekali terutamanya ketika beliau sering menggunakan forum-forum dunia, seperti persidangan OIC, Bangsa-Bangsa Bersatu, G-8 dan sebagainya untuk menyuarakan secara konsisten pandangannya tentang dunia Islam dan umatnya serta mengemukakan kesimpulan dan cadangan bagaimanakah cara dan strategi yang harus digunakan untuk menhadapi cabaran-cabaran semasa yang sering dihadapi oleh umat Islam. Ketika berucap di Universiti Al-Azhar pada 10 Mei 1998, semasa beliau menerima ijazah kehormat Universiti tersebut, Dr. Mahathir telah menyatakan kesimpulannya tentang Islam dan umat Islam yang sering disalahtafsirkan oleh musuh Islam dan golongan-golongan yang berkepentingan:

... I hold very strongly to my religion and I regret the perceptions of it by both the Muslims and non-Muslims which have led to Islam and Muslims being vilified, being associated with unsavoury activities and even made fun of. All these perceptions and vilifications are due not to Islam itself but to the interpretations given to it by Muslims and non-Muslims with vested interests, wanting to justify the wrongs that they have done or

intend to do. Islam is a perfect religion, but we are not perfect. It is our imperfections and refusal to adhere to the true teachings of Islam that have led to the decline and to the unfortunate circumstances that Muslims worldwide are in today.

(Saya amat kuat berpegang dengan agama saya dan saya berasa dukacita dengan persepsinya oleh orang Islam dan bukan Islam yang membawa kepada tanggapan salah terhadap Islam dan orang Islam, iaitu menghubungkannya dengan perlakuan yang buruk malah sehingga mempersenda-sendakannya. Semua gambaran dan persepsi buruk ini sebenarnya bukanlah disebabkan oleh agama Islam itu sendiri tetapi disebabkan oleh pentafsiran yang dibuat terhadap Islam oleh orang Islam dan bukan Islam yang mempunyai kepentingan sendiri dan untuk menjustifikasikan salah laku mereka yang telah dilakukan atau bercadang untuk melakukannya. Islam adalah satu agama yang sempurna tetapi kita sebenarnya yang tidak sempurna. Ketidaksempurnaan dan keengganan kita untuk mematuhi ajaran Islam vang sebenarnya itulah yang membawa kepada kemunduran dan keadaan buruk yang dialami oleh dunia Islam pada hari ini).

Pengalaman peribadi saya dengan pemikiran Dr. Mahathir tentang Islam sejak sekian lama memberi gambaran yang jelas kepada saya tentang keiltizaman (consistency), persepsi dan tanggapannya tentang imej Islam dan permasalahan yang dihadapi oleh kerajaan dan umat Islam sejak kejatuhan tamadun Islam akibat daripada krisis dalaman dan tekanan penjajahan Barat ke atas dunia Islam.

Seperti yang telah saya terangkan di atas, ketika beliau mengemukakan cadangannya untuk menubuhkan Institut Kefahaman Islam di negara kita pada tahun 1991, beliau secara peribadi telah mengemukakan idea penubuhannya kepada saya agar ditekankan tentang agenda kefahaman Islam yang global dan universal di kalangan orang Islam dan bukan Islam. Masalah yang dihadapi oleh Islam dan umatnya ialah masalah kefahaman yang luas tentang Islam dan ajarannya yang komprehensif sebagai satu cara hidup yang lengkap.

Orang Islam melihat dan memahami Islam sebagai satu "ritual" yang menyentuh sebahagian kecil kehidupan mereka. Akan tetapi mereka tidak dapat melihat Islam sebagai satu sistem yang menyeluruh untuk pembangunan mereka dalam segala

cabang ilmu pengetahuan, sains dan teknologi, ekonomi, politik, sosial dan sebagainya serta sebagai satu sistem yang mengatur kehidupan manusia di peringkat peribadi, masyarakat dan negara.

Orang bukan Islam pula mempunyai persepsi yang negatif terhadap Islam akibat daripada kempen memburuk-burukkan Islam secara yang amat teratur yang dilakukan oleh media Barat, iaitu dengan memperbesar-besarkan senario pertelagahan dan krisis dalaman umat Islam yang membawa kepada pertumpahan darah sesama sendiri dan perpecahan yang berlarutan serta salah laku lain yang dilakukan oleh segelintir umat Islam yang mempunyai agenda politik, ekonomi dan lain-lain lagi. Malah tindakan mereka itu tidak mempunyai kaitan dengan ajaran Islam itu sendiri.

Orang Islam juga digambarkan sebagai umat yang ganas dan radikal, mundur dan terkebelakang kerana ajaran Islam yang didakwa kononnya tidak mendorong umat Islam mencari kemajuan di dunia ini. Hal ini amat mempengaruhi persepsi orang bukan Islam tentang Islam dan umatnya, terutamanya apabila mereka dapat menyaksikan sendiri hakikat yang digambarkan itu dalam realiti masyarakat Islam yang bermasalah.

Dr. Mahathir berasakan bahawa kita haruslah berusaha mengikis persepsi negatif terhadap Islam seperti yang dibesar-besarkan oleh media Barat itu dengan memberikan gambaran yang sebenar tentang ajaran Islam dan menunjukkan contoh serta model orang Islam di negara kita sebagai satu set umat yang memahami dan menghayati ajaran Islam untuk kemajuan dunia dan akhirat supaya dengan itu kita akan dapat memprojekkan Islam dalam imej yang progresif, dinamik dan maju.

Kita bersyukur kepada Allah S.W.T kerana dalam memprojekkan imej positif tentang Islam dan umatnya di negara kita, maka kita telah benarbenar dapat menunjukkan model yang baik bagi pembangunan Islam dan umatnya iaitu dengan kemajuan yang dicapai oleh orang Islam di Malaysia dalam bidang ekonomi dan industri, teknologi dan ilmu pengetahuan yang lain, dalam bidang politik dan peningkatan taraf hidup umat Islam, juga dalam pembangunan wanita Islam yang berketerampilan dalam berbagai-bagai bidang kehidupan seperti yang diterangkan di atas. Dalam masa yang sama, wanita kita yang mempunyai kebebasan itu dapat mempertahankan maruah dan kehormatan mereka sebagai golongan yang komited kepada ajaran agama dan nilai-nilai kerohaniannya.

Seperti yang disebutkan di atas bahawa ketinggian agama Islam bukanlah sesuatu yang boleh diperkatakan secara lisan dan penuh dengan gambaran indah dalam bahasa yang penuh retorika pula. Tetapi dalam menerangkan tentang keagungan Islam, maka kita seharusnya dapat menunjukkan model dan contoh yang baik daripada masyarakat Islam sendiri mengikut idealisme yang sering kita gambar dan bicarakan itu.

Kita di negara ini umpamanya, sering berbicara tentang Islam yang dinamik, Islam yang mementingkan ilmu pengetahuan dan Islam yang berketerampilan dalam semua aspek pembangunan dunia. Maka kita seharusnya dapat membuktikan kepada dunia tentang umat Islam yang benar-benar cemerlang dalam bidang yang disebutkan itu serta benar-benar dapat mengemukakan contoh orang Islam yang cemerlang dan terkemuka dalam segala bidang yang diperkatakan.

Maka dalam hal ini, kemajuan dan pencapaian umat Islam di Malaysia sekurang-kurangnya dapat dijadikan contoh tentang teori dan idealisme yang sering kita bicarakan itu. Pencapaian para belia Islam dalam bidang kejuruteraan, perubatan, undang-undang, teknologi dan sebagainya merupakan contoh terbaik produk Islam dalam melahirkan tenaga manusia dan pemikir yang sejajar dengan ajaran Islam itu sendiri.

Kita dapat membuktikan kepada dunia luar

tentang contoh orang Islam yang berjaya dalam bidang industri berat seperti berjaya mengeluarkan kenderaan umpamanya. Ini merupakan satu pencapaian yang baik oleh umat Islam. Demikian juga penglibatan para profesional Islam dalam bidang industri petroleum, kelapa sawit, perubatan dan pimpinan institusi pengajian tinggi. Semua ini merupakan hasil pengeluaran tenaga manusia yang dituntut oleh Islam iaitu yang menggalakkan umatnya mencari ilmu pengetahuan dalam berbagai bidang kehidupan dunia ini dan menjalankan tugas seharian sebagai satu ibadat kepada Allah S.W.T.

Sistem pemerintahan negara kita juga sebenarnya telah banyak menolong pembangunan Islam dalam bentuknya yang global dan universal seperti yang diterangkan di atas. Sistem berkongsi kuasa dalam pemerintahan antara orang Islam dengan bukan Islam, pengagihan kekayaan yang sama rata, pemberian tempat yang sejajar kepada wanita, perlindungan terhadap kaum minoriti walau sekecil mana sekalipun kaum minoriti itu, semuanya ini menggambarkan toleransi dan keadilan pemerintahan yang diterajui oleh umat Islam. Ini sejajar dengan ajaran Islam sendiri yang berdasarkan hidup bersama secara aman dan produktif antara semua rakyat tanpa mengira latar belakang etnik dan agama.

Hal ini diperkuatkan lagi oleh pucuk pimpinan negara, terutamanya pada era Dr. Mahathir yang terus membangunkan negara ini berdasarkan Perlembagaan Malaysia yang telah memberikan status yang tinggi kepada Islam sebagai agama rasmi negara. Peruntukan Perlembagaan ini merupakan satu perlindungan yang amat baik bagi agama Islam di negara kita kerana dengan peruntukan ini kerajaan mempunyai kuasa untuk membangunkan Islam dalam semua bidang dan berupaya mempertingkatkan syiar Islam serta memertabatkannya sebagai agama rasmi negara.

Peruntukan dalam Perlembagaan yang menjamin kebebasan para pengikut agama lain mengamalkan ajaran agamanya juga merupakan satu bentuk toleransi yang perlu wujud dalam masyarakat berbilang agama. Malah perlembagaan menuntut semua kaum dan pengikut agama mengamalkan agama masing-masing dalam keadaan aman dan harmoni. Tuntutan inilah yang menghasilkan toleransi yang amat tinggi dalam masyarakat Malaysia yang telah berjaya mengekalkan keamanannya sejak berdekad-dekad yang lalu.

Kerukunan hidup antara kaum dan sikap toleransi dalam masyarakat merupakan satu kekayaan negara yang harus dipelihara dengan baik serta memerlukan kepemimpinan yang berpandangan

jauh dan luas pula visinya. Dr. Mahathir sering menyebut bahawa rakyat haruslah mengamalkan sikap toleransi ini agar masyarakat menjadi aman dan damai. Beliau menyebut bahawa ada negara dalam dunia ini yang tidak putus-putus mengalami krisis dan pergaduhan kaum sehingga menghancurkan negara itu sendiri. Malahan terdapat negara yang hanya mempunyai satu kaum sahaja tetapi kerana sebab-sebab yang tertentu mereka sering berbunuh-bunuhan sesama sendiri sehingga negara menjadi tidak stabil dari segi politik dan sosialnya. Semuanya ini membawa kepada keruntuhan ekonomi negara itu, manakala rakyatnya akan menjadi miskin, mundur dan menderita.

Pandangan ini amat berguna bagi rakyat Malaysia yang berbilang kaum dan agama ini. Malah ketika melihat keadaan perpecahan sesama orang Islam yang berlaku di negara kita sejak akhir-akhir ini, Dr. Mahathir telah menyatakan kebimbangannya bahawa pada akhirnya orang Melayu yang sedia lemah itu akan kehilangan segala-segalanya dalam kehidupan mereka dan mungkin akan menjadi seperti orang yang terpinggir, yang hanya menumpang di negara sendiri.

Dalam ucapannya di Dewan Bahasa dan Pustaka ketika memberi ceramah perdana tentang "Isu Palestin", beliau menyebut begitu banyak perkata-

an "marah" iaitu satu sifat orang Melayu akhirakhir ini. "Kerana marah, kadang-kadang tanpa sebab atau terlalu mengikut emosi dan akibat daripada perasaan yang terlalu fanatik, orang Melayu sering mengamuk tanpa mengira nyawa dan harta benda lagi. Ketika marah, mereka akan bertindak secara yang tidak rasional dan boleh memudaratkan orang lain, malah dirinya sendiri."

Sifat orang Melayu yang buruk inilah yang hendak dikikis oleh beliau. Menyebut sifat ini sebenarnya mengingatkan saya tentang sifat marah dan sikap memberontak yang sering digambarkan dalam cerita-cerita klasik Melayu. Ketika bertindak kerana marah, dendam, sakit hati dan terburu-buru inilah kita sering menyaksikan bagaimana orang Melayu berbunuhan sesama sendiri, menabur fitnah dan memendam rasa dengki serta dendam kesumat dalam hati, lalu bertindak menyebarkan fitnah dan cerita-cerita yang dusta, bertindak menikam orang lain, tidak kira kawan atau lawan. Kita juga sering menyaksikan dua orang yang berdendam atau beberapa kumpulan yang tenggelam dalam perangkap hawa nafsu sering menggunakan keris atau tombak untuk tikam-menikam dari belakang tanpa belas kasihan sama sekali. Sifat dan sikap buruk yang diwarisi inilah yang seharusnya dikikis daripada

masyarakat Melayu dalam zaman yang telah berubah ini.

Maka dalam hal ini, Dr. Mahathir amat prihatin dengan sifat penyayang dan pemaaf, bertoleransi dan berbaik sangka antara individu dengan kumpulan. Malah dalam masyarakat umumnya iaitu masyarakat Islam dan bukan Islam. Namun, sekiranya terdapat elemen-elemen yang boleh mengeruhkan suasana harmoni dan aman antara orang ramai atau yang boleh membawa mudarat dan kehancuran kepada negara, maka tindakan yang tegas mestilah diambil sebagai satu cara bagi mengelakkan bahaya yang lebih besar yang akan menimpa negara dan rakyat umum. Islam sendiri sering mengambil kaedah ini iaitu menolak keburukan itu mestilah didahulukan daripada mendapatkan sesuatu manfaat. Malah Islam juga mempunyai beberapa cara untuk menolak keburukan dan menutup segala pintu yang boleh membawa kepada kemudaratan.

Perasaan muhibah dan harmoni ini sepatutnya menjadi satu amalan antara umat manusia sejagat ketika dunia seluruhnya menghadapi krisis perhubungan yang berasaskan rahmat dan kemanusiaan ketika ini. Sebab itulah saya rasakan bahawa sekiranya terdapat sebarang usaha daripada manamana pihak sekalipun untuk menghubungkan tali

persahabatan dengan kita, maka kita seharusnya menerimanya dengan baik. Dari sudut inilah saya merasakan bahawa kunjungan Dr. Mahathir dan pertemuannya dengan Presiden Bush merupakan satu usaha yang baik untuk menyampaikan sesuatu yang dirasakan perlu disampaikan kepada ketua negara yang amat berpengaruh itu.

Demikian juga pertemuannya dengan Pope John Paul II, iaitu pemimpin tertinggi Katholik di Vatican City pada 7 Jun 2002. Pertemuan ini seharusnya dilihat dengan pandangan yang positif iaitu pertemuan antara seorang ketua negara yang beragama Islam dengan seorang ketua tertinggi agama lain. Pemimpin Islam sebenarnya bebas untuk bertemu atau menulis kepada mana-mana ketua agama lain dengan penuh ikhlas dan jujur untuk mencari kebaikan antara pelbagai pengikut agama dalam dunia ini. Masanya amat penting pada ketika ini untuk semua manusia merangka formula yang bersifat universal untuk mewujudkan sebuah kehidupan yang aman dan harmoni di dunia ini. Alangkah baiknya sekiranya umat Islam mengambil daya usaha untuk mencapai matlamat ini dan menghulurkan tali persaudaraan dengan orang lain. Bukankah Islam itu agama perdamaian dan bukankah al-Quran sendiri menegaskan bahawa manusia ini

diciptakan pelbagai kaum dan puak dengan tujuan untuk mereka berkenal-kenalan.

Tanpa membangkitkan soal pengiktirafan terhadap kepimpinan Dr. Mahathir sekalipun, kita dapat melihat hikmah di sebalik pertemuannya dengan Pope John Paul II itu. Pertama sekali, Dr. Mahathir dijemput oleh pihak Vatican City itu sendiri untuk pertemuan tersebut dan bukanlah Dr. Mahathir yang meminta untuk diadakan pertemuaan ini. Kedua, Dr. Mahathir dapat menemui ketua agama Katholik itu sebagai seorang pemimpin Islam yang moderate, terbuka dan toleran kerana beliau telah berjaya membuktikan kepada dunia bahawa kepimpinan negara Malaysia yang unik dengan kepelbagaian etnik dan agama ini telah dapat dijalankan dengan sebaik-baiknya.

Malaysia dengan penduduknya yang berbilang kaum dan agama telah dapat mempertahankan keharmonian dan perdamain rakyatnya dengan cara dan pendekatan pemerintahan negara yang telah ditadbirkan dengan penuh teliti dan adil. Maka dalam keadaan ini, pemimpinnya dapatlah mewakili masyarakat majmuk yang aman damai itu untuk menemui pemimpin agama lain dengan penuh hormat. Keadaan damai dalam rumah tangga sendiri memberikan nilai yang baik kepada Dr. Mahathir

dalam misinya menemui pemimpin Katholik itu.

Dr. Mahathir dalam menerajui negara ini, terusmenerus mencari wadah untuk membangunkannya menjadi negara maju dalam bidang ekonomi dan perindustrian menjelang tahun 2020. Dengan itu, beliau mengemukakan Wawasan 2020 yang pada dasarnya memerlukan pembangunan negara berasaskan nilai-nilai moral, etika dan agama. Dalam suratnya kepada saya bertarikh 22 Julai 1991, beliau telah memberikan satu komen yang menjadi prinsip beliau tentang kepentingan penghayatan Islam dalam realiti hidup kita daripada hanya memukul gendang raya tentang Islam, tetapi kehidupan kita semakin bertambah mundur dan ketinggalan. Gambaran Islam secara retorik inilah yang seharusnya dijauhi dalam zaman yang serba mencabar.

Tema "Kepimpinan Melalui Teladan" yang diperkenalkan oleh beliau pada tahun lapan puluhan benar-benar diketengahkan dalam segala aktiviti dan bidang, bukan hanya dalam bidang perkhidmatan awam sahaja. Maka dalam memperkenalkan Islam kepada masyarakat umum juga pendekatan yang harus dijalankan mestilah merupakan pendekatan yang strategik, berhikmah dan disertakan pula dengan contoh teladan yang baik.

Pada pandangan saya, keprihatinan Dr. Maha-

thir tentang pembangunan umat dalam pendidikan merupakan salah satu aspirasi yang mendorong beliau untuk menghadiri Kongres Pendidikan Islam Sedunia yang berlangsung di Universiti King Abdul Aziz, Makkah al-Mukarramah atas sifatnya sebagai Menteri Pelajaran ketika itu. Rumusan kongres tentang konsep pendidikan Islam secara sepadu yang menggabungkan ilmu wahyu dan ilmu aqli mendorong beliau menubuhkan Universiti Islam Antarabangsa yang menjadi kenyataan pada awal tahun lapan puluhan. Atas nama Persatuan Bekas Mahasiswa Timur Tengah, saya telah memberikan beberapa cadangan balas terhadap penubuhan universiti tersebut, dan seperti biasa Dr. Mahathir sentiasa menerima pandangan orang lain secara positif untuk diberikan pertimbangan terhadap pandangan pihak lain itu.

Orang yang mengenali peribadi Dr. Mahathir sebagai seorang individu, sering dapat melihat beliau sebagai seorang yang bersedia mendengar pandangan orang lain dan berbincang dengan sikap yang terbuka. Rentetan peristiwa yang akan saya catatkan seterusnya dapat membuktikan kebenaran ini.

Pada satu ketika dalam tahun lapan puluhan, pihak Radio Televisyen Malaysia (RTM) meminta saya membuat penilaian terhadap satu siri drama TV yang ditayangkan dengan mesej bahawa drama tersebut adalah diilhamkan oleh Dr. Mahathir. Saya tidak diberitahu tentang sebabnya mengapakan siri drama itu harus dinilai sedangkan siri pertama drama tersebut telah pun disiarkan. Tanpa menanyakan sebab tersebut maka saya pun menonton drama tersebut yang berbaki sebanyak tiga siri lagi. Setelah selesai menonton, saya menulis laporannya kepada RTM dengan satu salinan dihantarkan kepada Dr. Mahathir.

Ekoran daripada laporan saya itu, Dr. Mahathir telah memanggil saya menemuinya di pejabatnya di bangunan Parlimen. Beliau telah meminta penjelasan lanjut daripada saya kenapakah saya mencadangkan supaya drama tersebut diberhentikan siarannya dan tidak perlu disiarkan baki tiga siri yang berikutnya. Setelah memberi penjelasan, beliau nampaknya berpuas hati dan bersetuju dengan saya bahawa drama itu jika disiarkan dalam bentuknya yang asal dengan membawa nama beliau sebagai yang mengilhamkannya, maka hal ini boleh menjejaskan nama beliau, apa lagi sekiranya drama ini dijadikan isu politik Maka keadaan ini juga akan membawa akibat yang tidak baik terhadap niat dan tujuannya yang ikhlas supaya diterbitkan drama yang membawa tema kekeluargaan yang menghayati nilai-nilai murni dan akhlak yang baik.

Dr. Mahathir menyatakan bahawa memang beliau telah menasihatkan pihak RTM supaya membanyakkan drama keluarga yang dapat memberi contoh teladan yang baik dengan anggota-anggotanya yang menghayati nilai-nilai kekeluargaan yang baik, sesuai dengan ajaran Islam dan budaya kita sendiri. Beliau memberi bandingan kepada pihak RTM tentang satu drama bersiri Barat yang agak baik dan berjaya menonjolkan nilai-nilai keluarga yang baik iaitu siri drama Eight is Enaugh yang amat popular pada masa itu. Namun begitu pihak yang menyediakan skrip drama untuk RTM ini nampaknya telah tersalah tafsir maksud Dr. Mahathir itu, lalu mengeluarkan drama yang tidak sejajar dengan nasihat Dr. Mahathir itu, malahan mengeluarkan drama yang boleh mengelirukan pandangan umum tentang maksud Dr. Mahathir yang sebenarnya.

Dr. Mahathir berpuas hati dengan penjelasan saya kerana beliau sendiri tidak melihat siri pertama yang telah ditayangkan itu, sebaliknya beliau hanya mendengar daripada mulut orang lain. Daripada sini saya mendapat kesan bahawa Dr. Mahathir sentiasa mahu mendengar pandangan yang diberikan kepadanya dan akan menerimanya dengan baik sekiranya pandangan itu disertakan dengan alasan yang munasabah.

Untuk menggambarkan secara keseluruhan pemikiran Dr. Mahathir tentang Islam tentulah mengambil ruang dan masa yang panjang. Akan tetapi memadailah jika disebutkan di sini bahawa pemikiran beliau tentang Islam dan umatnya amatlah jelas dari awal-awal lagi iaitu ketika beliau mula berbicara dengan penuh minat tentang Islam dan umatnya sebagai seorang penulis yang kritikal pada tahun 1970. Kemudian sebagai pemikir dan pemimpin negara ketika beliau menceburkan diri sepenuh masa sebagai ahli politik pada tahun 1974.

Perbicaraannya tentang kehidupan umat yang seharusnya diwarnai oleh keharmonian, adab sopan dan beretika serta pembangunan Islam sendiri yang seharusnya dibina secara konkrit dan praktikal merupakan antara pandangannya yang berjaya dihayatinya atas sifatnya sebagai individu atau sebagai pemimpin yang berjaya mencorakkan pembentukan negara dan rakyatnya yang dinamik

seperti yang dapat disaksikan dalam era pemerintahannya.

Visi beliau dalam menangani isu keganasan dan kekerasan umpamanya telah lama mendahului segala macam tindakan dan pemikiran pemimpin lain selepas peristiwa 11 September. Beliau telah memberikan pentafsiran yang cukup jelas tentang keganasan dalam ucapannya pada 1 April 2002 yang lalu.

Pandangannya tentang Islam secara syumul telah dapat mewarnai kehidupan rakyat Malaysia dan menjadi wadah dalam menyusun agenda negara untuk pembangunan sains dan teknologi, perdagangan dan kewangan, kebendaan dan kerohanian malah fizikal dan spirituil.

Pemikirannya yang strategik sering menjadi satu isu kontroversial sebelum orang awam dapat memahaminya dengan baik. Maka pemikiran yang kontroversial itu akhirnya dapat difahami dan dihargai oleh ramai.

Berkat ketajaman pemikiran dan pandangannya inilah, maka beliau selalu berjaya mengatasi segala krisis yang dialaminya. Krisis melanda kehidupannya sebagai pemimpin negara satu demi satu, malah kadang-kala kita merasakan beliau memang sengaja mencipta krisis dan membuat masalah. Akan tetapi akhirnya kita dapat mengetahui bahawa

beliau mencipta masalah bertujuan untuk menyelesaikannya dengan lebih baik bagi kepentingan semua dan kepentingan agama, bangsa dan negara.

Sesungguhnya, tidak ramai pemimpin yang berani bercakap benar, ikhlas dan yang keluar daripada hati nuraninya sendiri secara jujur, kerana takut mengambil risiko dan bimbang akan pandangan umum yang akan mempersoalkannya atau menghakis pupolaritinya. Akan tetapi Dr. Mahathir tetap jujur dengan prinsipnya.

Nota: Kandungan buku ini merupakan kembangan daripada kertas kerja yang telah dikemukakan di Kolokium Pemikiran Dr. Mahathir Mohamad anjuran Kerajaan Negeri Melaka dan Institut Kajian Sejarah dan Patriotisme Malaysia, pada 22-23 April 2002 di Melaka.

RUJUKAN

- 1. Kumpulan Ucapan Dr. Mahathir.
- 2. Teks Ucapan Dr. Mahathir dalam Program IKIM.
- 3. Dr. Mahathir Mohamad, 2002. *Islam & The Muslim Ummah*, Hashim Makaruddin (ed.). Kuala Lumpur, 2002.
- 4. Potongan Akhbar bertajuk "Islam dan Imej Positif".

PEMIKIRAN DR. MAHATHIR TENTANG ISLAM



PERDANA MENTERI MALAYSIA

22 Julai 1991

YBhg Prof Dato' Ismail Ibrahim Pengarah Pusat Bahasa Universiti Islam Antarabangsa Jalan Universiti Kuala Lumpur

sa

YBhg Prof

Rujukan: Surat bil. IIU 1.6-4/42 bertarikh 18 Julai 1991



Saya telah melihat beberapa tajuk dari ceramah "Islam dan Wawasan 2020". Isi kandungan ceramah amat tepat dan sesual. Tetapi oleh kerana ia hanya menonjolkan penceramah, maka pengertian adalah terhad jika penonton tidak betul-betul memberi perhatian kepada isi kandungan tajuk. Sebaliknya jika diselangselikan dengan gambar yang menjelaskan maksud, maka penonton akan lebih mudah faham dan lebih lekat di hati. Umpamanya, apabila dikatakan orang Islam lemah dan terhina, mungkin gambar askar Iraq menyerah diri di guna, atau jika soal amanah disebut maka lapuran kes pecah amanah ditunjuk.

Kita banyak masa lagi. Justeru eloklah jika siri ceramah ini diperbaiki lagi.

Saya mengucap terima kasih kepada YBhg Profikerana mengambil berat tentang Visi 2020 dan peranan agama Islam dan orang Islam. Tekanan tentang nama Islam tidak perlu. Jika orang Islam berjaya, masyarakat tidak dapat tidak akan kaitkan kejayaan ini dengan agama Islam. Sebaliknya jika kita pukul gendang

PEMIKIRAN DR. MAHATHIR TENTANG ISLAM



2.

Islam tetapi kita tidak berjaya kesan terhadap agama kita dan orang Islam lebih buruk.

Salam hornat,

DR. MAHATHIR BIN MOHAMAD

Surat Dr. Mahathir tentang siri ceramah TV "Islam dan Wawasan 2020"

PEMIKIRAN DR. MAHATHIR TENTANG ISLAM



PERDANA MENTERI MALAYSIA

9hb Jun, 1983.

Dr. Ismail Haji Ibrahim, Yang Di-Pertua, Persatuan Bekas Mahasiswa Timor Tengah, 13-A Lorong Universiti C, Seksyen 16, Petaling Jaya, Selangor.



4.B. Doch,

Pimpinan Universiti Islam Antarabangsa

Saya mengucap berbanyak terimakasih kepada Persatuan Bekas Mahasiswa Timor Tengah kerana sokongan terhadap penubuhan Universiti Islam Antarabangsa. Segala pandangan yang diberi akan diambil perhatian oleh Kerajaan dan pihak pentadbiran Universiti Islam Antarabangsa.

Wassallam.

Salam Hormat,

(DATO SERI DR. MAHATHIR BIN MOHAMAD)

Keprihatinan Dr. Mahathir. Surat yang diterima tentang pimpinan Universiti Islam Antarabangsa.

Biodata



ISMAIL BIN HJ IBRAHIM JSM, SDK, DSDK dilahirkan di Kampung Matang Berangan, Sungai Petani, Kedah. Mendapat pendidikan awal di Sekolah Melayu Kampung Matang Berangan sehingga darjah lima dan Sekolah Arab Al-Maahad Al-Mahmud, Alor Setar sehingga darjah lapan

(1949-1957). Beliau memperoleh Sijil Tinggi dari Kolej Islam Malaya (1959-1961) yang diiktiraf oleh Universiti Al-Azhar, Mesir sebagai Ijazah pertamanya. Memperoleh Ijazah Sarjana Sastera (M.A.) Pengajian Arab dari Universiti Al-Azhar pada tahun 1967 dan memperoleh Ijazah Doktor Falsafah (Ph.D) dalam bidang yang sama pada tahun 1975 dari Universiti St. Andrews, Scotland, United Kingdom.

PENGANTAR

Berkhidmat sebagai guru agama di Sekolah Menengah Ibrahim, Sungai Petani, Kedah (1961-1962) dan di Sekolah Aminuddin Baki, Kuala Lumpur (1967-1968). Menjawat jawatan sebagai Penolong Pegawai Penyelidik dan seterusnya Pegawai Penyelidik Sastera di Dewan Bahasa dan Pustaka (1968-1972). Menjadi pensyarah di Jabatan Pengajian Arab dan Tamadun Islam, Fakulti Pengajian Islam UKM (1975–1981) dan dinaikkan pangkat sebagai Profesor Madya. Pada tahun 1981-1992 beliau bekerja sebagai perunding di Institut Kajian Strategik dan Antarabangsa (ISIS) untuk merangka penubuhan Institut Kefahaman Islam Malaysia dan telah dipinjamkan ke UIA untuk menyertai pasukan petugas Penubuhan universiti tersebut seterusnya berkhidmat sebagai Pengarah Pusat Bahasa hingga tahun 1991. Dilantik sebagai Ketua Pengarah pertama Institut Kefahaman Islam Malaysia (secara kontrak) dari 1992-2002. Kini beliau dilantik sebagai Profesor Adjun Universiti Industri Selangor (UNISEL).

Beliau juga pernah menulis, menyunting dan menterjemah artikel, majalah dan buku ilmiah dari bahasa Arab ke bahasa Melayu. Antaranya dalam ruangan kolum *Mingguan Malaysia* berkaitan "Isuisu Islam Semasa" dan "Cetusan Pemikiran Dr. Ismail Ibrahim".